

1

Терезени тубюнде терек сары
Болгъанды. Мен санга шош назмуланы
Айтырыргъа сюеме. Шауданнга барып,
Анам сакъ, алып колиучю суу аны
Челеклеринде шош туруучусунлай,
Шош назмула айтайым бу ингирде!
Анам тапчанда олтуруучусунлай,
Ахшам къарангысы юйге шош кирди.
Тауну къабыргъасындагъы къарча, шош,
Алай аныча сууукъ угъай, жылы,
Юйде ёсген ийнакъ къозуча, жууаш,
Кесинги, бу къол аязынглай, жылы
Назмулагъа тынгыла бу ингирде,
Крандан тынч акъгъан суу тауушхача.
Санга кёрюннгенлей турсун бир-бирде
Юй ичинде къарылгъач шош учханча.

2

Жарсыулу сагъатларымда къолларынг,
Башымы сылай, бердиле асылукъ,
Келгенимде, ауараладан арып,
Унутдургъанса къайгъыны, ачыуну.
Аны ючюн сау бол деп да аз айтдым.
Кечгинлик бер, жаным, сылхыр поэтге!
Мени сакълагъанлай, тангынг кёп атды,
Да, жолум къынгырына да кёп кетди...
Къыртчин сууукъдан толу сёзлени да
Айтханма, жүрегинге жара сала,
Чыгъаналача болуп кеслери да,
Ачитхан да этдиле сени ала.
Алай аи жарыгъына ушай тургъан
Жумушакъ сёзлени да мен айтханма
Санга. Болмай бетинги унутургъа,
Узакъ кетсем, ашыгъып къайытханма.

3

Узакъ кетсем, ашыгъып къайытханма,
Сени бетингден ариу бет жокъду деп,
Этген ашынгы да алай татханма,
Андан татлы аш жокъча жер юсюнде.
Сора мен сокъур болгъан кюнлерими
Жарсыуларын ангылагъанма, къарап
Бетинге, жулдузлача кёзлеринге.

О, ала жарыкъ этген кече арам!
Мен аланы кыйматларын кем этген
Кюнлерим ючюн кыйналады жаным.
Неден да кыйын болады поэтге
Терс болганын билген сагыаты аны.
Тишируу эр кишини жүрегини
Къанатларыды дегендиле эртте.
Ол, кыуаты болуп туугъан жерини,
Къарангы сагыатны да жарыкъ этер.

4

Ариулугъунгу манга саугъа этдинг.
Гитче саугъады деп жаланда сокъур
Айтыр. Сен, керти да, журча кыыз эдинг.
Ол ариулукъну бийиклигинде тур!
Ол ариулугъунг болду къанатларым,
Насыплы этип, бийикге учургъан,
Къарангы, кыйын кюнюм андан жарып,
Кюл этер жарсыуланы унутдургъан.
Санга Россейни уллу поэти
Айтханды - кавказлы сурат кибик деп.
О, мени кеп насыплы этген бетинг!
Ариулукъ, фахмуча, сыйлы, бийикди,
Ол, акъылгъа, кишилике тенг бола,
Къарангы кюнню жарыта, ёлетден
Бери келеди. Ариулугъунг бла
Сууукъ кыш кюнлерими да жаз этдинг!..

5

Шаркъны поэти тиширууну жургъа
Эртте тенг этип кыйгъанына жарсып
Турама. Аны бек алгъа айтыргъа
Къалай сюе эдим, андача насып,
Бююн аны санга кесим айтыргъа,
Сени кезлеринги жур кезлерине
Ушатып, алай кийирирге жыргъа,
Ушатып сакъ жугъутур кезлерине!
Аны бек алгъа айтхан шаркъ поэти
Киши да кермеген жерни тапханча,
Кетди аллай алапат затны этип,
Белгисиз тенгизге жолну ачханча.
Сау болсун. Минг жыл мындан алгъын айтхан
Сезлерин къатлай, къарайма мен санга.
Эскилик жокъду ариулукъгъа, отха,
Жаууннга, акъылгъа, эрликге, тангнга!

6

Тиширыу! Кючюнге къарап тургъанда,
Мени сёзлерим къалай гитчедиле!
Жууадыла жангы сабий туугъанда,
Ёлгенлеге да кебин бичедиле
Тиширыу къоллары, сыйлы къоллары.
Алагъа дайым хурмет этип турдум,
Тиширыу сёзди жарсыууму барын,
Аны алтын этегине баш урдум.
Мен сени ол бийикледен тюшюрюп
Тургъан кюнюм болгъан эсе, кечип къой!
Билдим суймекликсиз назмум юшюрюн,
Тиширыусуз болмаз жилию неда той.
Жылы къолунгу жаягъыма салып,
Къарайма саргъала тургъан терекге.
Мен жашай келген кюнлерим барысы,
Зурнукла болуп, кетген кибик кёкге...

7

Аллай къыз эдинг - сени эринлеринг
Гюл ийис эте, орамда баргъанынг,
Жур баргъаныча, женгил. Сени кёрюп,
Минг жыл мындан бурун да назмуланы
Шаркъны поэти алай жазгъаныча,
Къыз кёзлерин жур кёзлеге ушатып,
Насыплы болуп, санга къарагъанча,
Тангы ары дериден жарыкъ атып.
Гюл ийис эте ариу эринлеринг,
Кюн ийис эте эдиле къолларынг.
О, ала насыплы этген кюнлерим!
Къыш келеди, жолланы жаба къары...
Энтда, аллай къыз болуп, чыкъ аллымдан!
Терегим, алгъынча, жашилле турсун.
Ол ариулугъунгу дуняда - мында
Назмум, бир кюн болса да, артыкъ тутсун!

8

Тереклени сарылыгъына бирге
Къарайыкъ, жашиллигине къарагъан
Кюнюбюздеча. Ёмюрде да ёрге
Бармайды суу... Къолунг жылыды, къургъакъ.
Бюгюн да бирге къарайыкъ таулагъа,
Биринчи жолукъгъанда къарагъанча,
Энтда биз алай къарайыкъ алагъа,
Биз да алача тюрленмей къалгъанча.
Ала минг-минг жылланы турадыла,

Тюрленмейин, агъаргъанлай къарлары.
Угъай, бирде ары да къонадыла
Къара туманла, солугъанча арып.
Энтда къарайым мен санга, бек алгъа
Кёрген жарыкъ кюнюмде къарагъанча,
Чачынг да бой бермегенлейин чалгъа,
Андан бери сен тюрленмей къалгъанча!..

9

Терек терезе тубюнде саргъала
Турады. Къыш жууукъ болгъанды энди.
Сен, жылы къолунгу башыма сала,
Анда къарны сезер кюнюм жетгенди.
Бу сёзлени биринчи айтхан адам
Бек ахыр адам да туююлме, кёрдюм,
Бизден сора да бу сейир таулада
Суула тохтамай барырла ёмюрде.
Кёп сынадым мен кюнлени игисин,
Бетинги жарытхан тангла агъара.
Жууукъ келген къышымы къар ийисин
Эштеме, саргъыл дуппурлагъа къарап.
Олтурама, жылы къолунгу тутуп.
Жашаугъа ыразыма: манга сени
Ариулугъунгу, назмуланы отун
Къызгъанмады юсюнде бийик жерни!.